

KAPITULLI III

S U P A T

Supat zakonisht përgatiten me lëng mishi ose pule. Mund të përdoret dhe uji ku janë zier makaronat, patatet, spinaqi dhe barishtet e tjera, sepse këto lëngje janë të pasura me lëndë ekstraktive, kripra minerale dhe lëndë të tjera ushqimore të vlefshme për organizmin e njeriut.

Lëndët ekstraktive dhe lëngu i mishit i japin supës aromë dhe shije, e cila ngacmon organet e tretjes dhe si rezultat ndihmon në përvetësimin e ushqimit nga organizmi i njeriut. Nga mënyra e përgatitjes supat ndahen në tri grupe: supa të ziera bashkë me garniturë (pjesa e ngurtë e supës), supa krem dhe supa të kthjellëta. Supat gjithnjë duhet të jepen të nxehta jo më pak se 80-85°.

Si përgatitet një lëng mishi ose kockash i zakonshëm.

Lëngu i mishit del më i shijshëm nga mishi ose kockat e lopës dhe të viçit, bile është më i shijshëm dhe më aromatik kur përgatitet nga pjesa e gjoksit. Kockat copëtohen nëpër kyçe, shpëlahen dhe vendosen në fund të tenxheres, mbulohen me ujë të ftohtë dhe vihen në zjarr të fortë derisa të marrin valë. Hiqet shkuma dhe lihet të ziejë në zjarr të javashëm. Në mes të zierjes shtohen lëndë aromatike si: qepë mundësisht të pjekura mbi sobë, karota, rrënjë selino, fletë dafine, piper i zi dhe

pak kripë. Lihen të ziejnë rreth 2-3 orë në zjarr shumë të javashëm. Në rast se lëngu vlohët në zjarr të fortë ai turbullohet dhe humbet shijen. Për të shkurtuar kohën e zierjes së kockave mund të përdoret tenxherja me presion. Ndërsa në tenxhere të zakonshme mishi zien për 2-3 orë, në atë me presion në zjarr të javashëm zien për 30 min-1orë. Lëngu i përgatitur nga zierja e kockave, kullohet dhe përdoret për supë. Në rast se së bashku me kockat ka dhe copa mishi, atëherë mishi hidhet në tenxhere në gjysmën e kohës së zierjes së kockave, pasi do më pak kohë për t'u zier. Për të provuar nëse mishi është zier shpohet me pirun; në rast se piruni hyn e del lirisht atëherë mishi është gati.

Lëngu i shpendëve zien njëlloj si ai i mishit, por me afat kohe më të shkurtër.

Nganjëherë në supat përdoret edhe lëngu i peshkut, i cili mund të përgatitet nga peshq që nuk kanë erë të rëndë, si qefulli, levreku, kocja, etj., ndërsa krapit, kubla, ngjala, nuk këshillohen. Gjithashtu lëngu i peshkut merret dhe nga pjesët si koka, bishti, fletët, etj. Në tenxhere vendosen mbeturinat e peshkut, kurse sipër copat e tij të pastruara, qepë të pjekura mbi sobë, karota, rrënjë majdanozi, selino, fletë dafine, piper kokërr dhe ujë. Tenxherja vendoset në zjarr të fortë derisa të marrë valë. Në fillim ajo duhet të mbulohet me kapak i cili hiqet pasi të ketë marrë valë. Lëngu pastrohet nga shkuma dhe lihet të ziejë në zjarr të javashëm për 20-30 minuta; kullohet dhe përdoret për supë.

a) SUPA TË ZIERA ME GARNITURË

Kjo lloj supe përgatitet me lëng mishi, kockash, lëng perimesh, makaronash, peshku etj. Në lëngun e vluar hidhen produktet. Në mes të zierjes disa supa rregullohen me salcë, me perime të kaurdisura ose miell të kaurdisur, disa të tjera në fund të zierjes priten me vezë e limon. Zarzavatet për këto lloj supash, zakonisht priten me vezë e limon. Zarzavatet për këto lloj supash, zakonisht

priten në formë kubike. Gjatë hedhjes së zarzavateve duhet të kihet parasysh koha e zierjes së tyre, që ato të bëhen gati në një kohë.

Produktet e ziera më tepër ose më pak e keqësojnë shijen e supës. Më poshtë po japim një tabelë e cila do të shërbejë si orientim për radhën e hedhjes së produkteve gjatë gatimit (duke u nisur nga koha e zierjes së tyre).

Lulelakër	12-25	minuta
Patate kokërr	20-30	»
Patate të prera	12-15	»
Perime të kaurdisura	10-12	»
Spinaq	5-8	»
Lakër e bardhë	25-30	»
Bishtajë jeshile	12-15	»
Bizele jeshile	8-10	»
Makarona fidhe	5-7	»
Makarona të imëta (elbare)	8-12	»
Makarona spageti	25-30	»
Oriz	25-30	»

Gjatë ndarjes në pjata në shumicën e supave hidhet majdanoz ose kopër e grirë imët. Jeshillëqet jo vetëm që zbukurojnë pamjen e supës, por dhe e pasurojnë atë me aromë dhe vitamina.

Në këtë grup hyjnë: sup me oriz, makarona, perime, fasule dhe shumë të tjera.

39. Supë orizi me vezë dhe limon

Në lëngun e mishit ose në ujë të vluar hidhet orizi i larë e i pastruar, kripa, dhe lihen të ziejnë në zjarr të javashëm rreth 30 minuta. Në fund supës i shtohet pak lëkurë limoni e grirë me rende; i jepet një valë, hiqet nga zjarri dhe pas 5-6 minutash rregullohet me të verdhën

e vezëve. Për këtë, në një enë porcelani hidhet e verdha e vezës, rrihet mirë, dhe duke e rrahur i shtohet lëng limoni, ose limontoz i tretur në ujë dhe pak e nga pak lëng supe. Në fund rregullohet me majdanoz të grirë hollë dhe piper të zi, sipas dëshirës.

Për 4-5 persona duhen:

Lëng mishi 1,5 litra, oriz 4 lugë gjelle, gjalpë 50 gr ose 1 lugë gjelle, 1 të verdhë veze, 1/2 kokërr limon, majdanoz, kripë, piper i zi.

40. Supë orizi

Në lëngun e mishit ose në ujë të vluar hidhet orizi i pastruar e i larë. Pas 10 minutash vlimi shtohen qepë, karota e rrënjë majdanozi të kaurdisura me gjalpë; hidhet kripë dhe vazhdon zierja 15-20 minuta të tjera, derisa orizi të jetë gati. Në fund supës i hidhen jeshillëqe të grira hollë dhe piper.

Për 4-5 persona duhen:

Lëng mishi 1,5 litra, oriz 4 lugë gjelle, 1 kokërr qepë, 2-3 karota, majdanoz, gjalpë 50 gr, kripë, piper të zi.

41. Supë orizi me domate ose salcë

Në një tigan me gjalpë kaurdisen qepë të grira hollë deri sa të zverdhen pak, pastaj hidhen domate të grira (të cilave u është hequr cipa) ose salcë domatesh, kaurdisen dhe 2-3 minuta të tjera dhe hiqen nga zjarri.

Në lëngun e mishit ose në ujë të vluar hidhet orizi i larë e i pastruar dhe pas 10 minutash vlimi hidhet kripa, perimet e kaurdisura dhe lihen në zjarr të java-shëm për 15-12 minuta të tjera derisa supa të jetë gati. Në fund ajo rregullohet me majdanoz të grirë imët dhe piper të zi.

Për 4-5 persona duhen:

Lëng mishi 1,5 litra, oriz 4 lugë gjelle, 1 qepë, 2-3 domate ose gjysmë lugë gjelle salcë, gjalpë 50 gr, kripë, piper, majdanoz.

42. Çorbë orizi me gjoks dashi

Mishi i dashit ose i deles, mundësisht pjesa e gjoksit, pritët në copa kubike të vogla dhe vihet të ziejë. Pasi të ketë marrë valë, hiqet shkuma dhe lihet të ziejë në zjarr të javashëm rreth 1 orë. I shtohet oriz si dhe qepë, të grira hollë. Ziejnë për 30 minuta të tjera derisa orizi të jetë gati. Veçan, në një tigan me gjalpë, shtohet dhjamë dashi i prerë në copa të vogla, kaurdiset pak, shtohen domate të grira hollë, të pastruara nga cipa, ose salcë domatesh dhe spec djegës. Tigani hiqet nga zjarri dhe përzihet me hudhra të shtypura. Në këtë përzierje hidhet pak nga pak lëng supe dhe kur salca është gati hidhet në supë. Supa vihet përsëri të marrë një valë dhe pas kësaj është e gatshme. Gjatë ndarjes në pjatë hidhet majdanos e kopër e grirë imët.

Për 4-5 persona duhen:

mish dashi 300 gr, oriz 3 lugë gjelle, qepë 1 kokërr, gjalpë 50 gr, ose 1 lugë gjelle, dhjamë dashi 50 gr, hudhra 3-4 thelpinj, 2 kokrra domate, spec djegës, kopër, majdanos.

43. Supë magjerica

Kjo supë përgatitet me të brendshmet e bagëtive të imta, me përjashtim të plëncit. Nga koka dhe këmbët mund të përgatitet lëng, ndërsa në mungesë të tyre mund të përdoret lëng mishi i zakonshëm ose ujë.

Të brendshmet shpëlahen dhe përvëlohen me ujë të vluar, kullohen dhe priten në copa të vogla kubike. Në tenxhere me gjalpë kaurdisen të bardhat e qepëve të njoma derisa të vyshken, por të mos marrin ngjyrë, shtohen të brendëshmet, kaurdisen pak, shtohet lëngu i tyre dhe kur të marrë valë hidhet orizi i pastruar e i larë. Supa lihet të ziejë derisa orizi të jetë gati, rregullohet me kripë, hiqet nga zjarri dhe pas 5-6 minutash bëhet me vezë e limon. Në fund të supës i hidhet kopër e grirë hollë dhe piper i zi i bluar.

Në qoftë se kemi lëng koke e këmbësh, atëherë ato pastrohen nga tuli i cili copëtohet dhe hidhet në supë.

Për 4-5 persona duhen:

të brendshmet 250-300 gr, gjalpë 50 gr, ose 1 lugë gjelle, oriz 3 lugë gjelle, qepë të njoma 2-3 copë, vezë 1 kokërr, limon 1/2 kokrre, kopër, piper i zi.

44. Supë me makarona

Në lëngun e mishit që vlon hidhet kripë dhe makarona të copëtuara ose makarona të vogla; ziejnë derisa të jenë gati; pastaj supa rregullohet me vezë e limon, i hidhet majdanoz i grirë imët, piper i zi i bluar dhe gjalpë i skuqur pak. Sipas dëshirës mund të hidhen dhe 2 lugë kaçkavall të grirë në rende.

Për 4-5 persona duhen:

Lëng mishi 1,5 litra, makarona 1 gotë, gjalpë 50 gr, vezë 1 kokërr, kripë, piper, majdanoz.

45. Supë makaronash me perime

Karotat, majdanozi, selinoja dhe pjesa e bardhë e preshit kaurdisen me yndyrë, shtohen domate të freskëta të qëruara nga cipa ose salcë. Këto hidhen në lëng mishi të vluar. Sa të marrin valë shtohen makarona të copëtuara ose të vogla, që lihen të vlojnë 35-40 minuta në zjarr të javashëm. Në fund të zierjes shtohen majdanoz i grirë imët dhe piper i zi.

Për 4-5 persona duhen:

lëng mishi 1,5 litra, makarona 1 gotë, gjalpë 50 gr, karota 2-3 copë, qepë 1 kokërr, majdanoz, selino, kripë, piper.

46. Supë me petë dore (makarona të shtëpisë)

Zakonisht kjo supë përgatitet me lëng pule. Mishi i pulës pas zierjes copëtohet dhe hidhet në supë.

Karotat e pastruara dhe qepa e grirë hollë kaurdisen

me gjalpë ose me dhjamë pule dhe hidhen në lëngun e vluar ku shtohen petët e dorës së cilat janë përgatitur që më përpara; hidhet kripë, piper, fletë dafine dhe lihen të vlojnë 15-20 minuta. Para ndarjes në pjata supës i hidhet majdanozi i grirë hollë.

Petët e dorës përgatiten kështu: mielli i situ vendoset në tavolinë; në mes hapet një gropë ku hidhen vezë dhe pak ujë i ftohtë (për 1 vezë -1/4 gotë ujë). Pastaj shtohet kripë dhe zihet një brumë i fortë. Brumi duhet të punohet mirë sa të mos duket asnjë vrimë gjatë prerjes. Brumi duhet të hapet pas 15-20 minutash në peta me trashësi 2-3 mm, të cilat lyhen me miell dhe priten në shirita me gjerësi 5-6 cm. Shiritat vendosen njëri mbi tjetrin 5-6 shtresa dhe priten në fije të holla të cilat thahen pak dhe hidhen në supë.

Për 4-5 persona duhen:

lëng mishi 1,5 litra, karota 2-3 copë, qepë 1 kokërr. gjalpë 50 gr dhe pak majdanoz.

Për petat — miell 1,5 gota uji, vezë 1 kokërr, kripë.

47. Supë patatesh

Supë patatesh mund të përgatitet me lëng mishi, peshku ose me ujë. Kjo supë përgatitet vetëm me patate por mund t'i shtohen fasule ose bizele.

Qepët, karotat, selinoja dhe majdanozi grihen hollë kaurdisen me gjalpë ose me yndyrë. Në fund të kaurdisjes shtohet salcë ose domate të freskëta të qëruara nga cipa.

Patatet pastrohen, lahen dhe priten në kubikë të vegjël. Në lëngun e vluar hidhen perimet e kaurdisura dhe pasi marrin valë shtohen patatet dhe zihen 15-20 minuta. Në fund të zierjes shtohet kripë, majdanoz i grirë imët dhe piper i zi.

Për 4-5 persona duhen:

lëng mishi 1,5 litra, patate 750 gr (6-7 kokrra mesatare), qepë 1 kokërr, karota 2-3 copë, selino 1 kokërr, majdanoz 2-3 rrënjë, domate 3-4 kokrra ose

salcë domatesh 1/2 lugë gjelle, gjalpë 50 gr, ose yndyrë 1 filxhan kafeje, kripë, piper.

48. Supë patatesh me frikadele

Kjo supë përgatitet si ajo e mësipërmja, por kur hidhen patatet hidhen edhe frikadelet (qofte të vogla sa një kokërr ulli).

Për qoftet: mishi i biçit grihet në makinë 2 herë së bashku me qepët. Shtohet kripë, piper i bluar dhe të bardha vezësh; përzihen mirë dhe ndahen në copa të vogla.

Për 4-5 persona duhen:

lëng mishi ose ujë 1,5 litra, patate 6-7 kokrra, qepë 1 kokërr, karota 2-3 copë, selino 1 kokërr, domate 3-4 kokrra ose salcë 1/2 lugë gjelle, gjalp 50 gr, ose yndyrë 1 filxhan kafeje.

Për qoftet: mishi biçi ose derri 200 gr, qepë 1 kokërr, të bardha veze 1 kokërr, kripë, piper i zi.

49. Supë patatesh me lëpjetë

Qepët, preshtë, karotat dhe rrënjët e selinos grihen hollë, kaurdisen me gjalpë; patatet pastrohen, lahen dhe priten në copa kubike, ndërsa lëpjeta lahet mirë dhe pritet në 2-3 copa secila. Në lëng të vluar hidhen perimet e kaurdisura sa të marrin valë, shtohen patatet dhe vlohen 10-15 minuta. Pesë minuta para mbarimit të zierjes hidhen gjethet e lëpjetës dhe kripë. Në fund supa rregullohet me majdanoz të grirë hollë e piper të zi.

Për 4-5 persona duhen:

lëng mishi ose ujë 1,5 litra, patate 4-5 kokrra, qepë 1 kokërr, karota 2-3 copë, rrënjë selino 1 kokërr, presh 2 copë (pjesa e bardhë), yndyrë 50 gr, lëpjetë 500 gr, kripë, piper, majdanoz.

50. Supë patatesh me oriz ose me makarona

Qepët, preshtë, karotat dhe selinoja priten në copa të vogla e kaurdisen; u shtohen domate ose salcë dhe lihen në një anë. Orizi i larë e i pastruar ose makaronat hidhen në lëng mishi ose në ujë. Në mes të zierjes së tyre shtohen perimet e kaurdisura dhe patatet e prera në kubikë të vegjël. Lihen të ziejnë edhe për 20-25 minuta, i shtohet kripë dhe në fund majdanoz i grirë imët. Kur ndahet në pjata i hidhet piper i zi.

Për 4-5 persona duhen:

lëng mishi ose ujë 1,5 litra, vaj 1 filxhan kafeje, qepë 1 kokërr, presh 2 copë karota 2-3 copë, një rrënjë selino, domate 2-3 kokrra ose salcë 1/2 lugë, patate 4-5 kokrra, 1 filxhan kafeje oriz ose 3/4 gotë çaji makarona.

51. Supë fasulesh pa salcë

Fasulet e pastruara e të lara vendosen për t'u zier? Pas 30 minuta zierje i derdhet uji dhe hidhet lëng mishi ose ujë tjetër i nxehtë. Gjysmë ore para përfundimit të zierjes së fasules shtohen, qepë, karota, selino të prera në copa kubike të vogla, spec djegës dhe një sasi vaj ulliri. Lihen që të ziejnë derisa të jenë gati pastaj rregullohen me kripë, piper, e majdanoz të grirë hollë. Supa vendoset nëpër pjata dhe hidhet vaj ulliri: sipas dëshirës mund të shtohen hudhra të shtypura.

Për 4-5 persona duhen:

fasule 1 filxhan çaji, vaj 4-5 lugë, qepë 1 kokërr, karota 2-3 copë, selino 1 rrënjë, kripë, piper, majdanoz.

52. Supë fasulesh me salcë

Fasulet e pastruara, lahen dhe zihen rreth 30 minuta. Derdhet uji dhe hidhet lëng mishi ose ujë i nxehtë, shtohet pak vaj dhe një pjesë e perimeve: karota, se-

lino të prera në formë kubike, ndërsa pjesa tjetër e perimeve të prera kaurdisen me yndyrë. Në fund të kaurdisjes shtohen domate të freskëta të cilave u është hequr cipa ose salcë. Këto i hidhen fasuleve në fund të zierjes.

Supa rregullohet me kripë, piper, majdanoz dhe spec të kuq djegës, sipas dëshirës.

Për 4-5 persona duhen:

fasule 1 filxhan çaji, vaj 4-5 lugë, qepë 1 kokërr, karota 2-3 copë, selino 1 kokërr, 2-3 domate ose 1/2 lugë salcë, kripë, piper, majdanoz spec.

53. Supë orizi me fasule

Fasulet e thata pastrohen, lahen dhe vihen të ziejnë. Në një tenxhere tjetër me yndyrë, kaurdisen qepët e grirë hollë, shtohen domate të prera në kubikë të vegjël ose pak salcë domatesh dhe kaurdisen 2-3 minuta të tjera.

Pastaj shtohet lëng mishi ose ujë dhe sa të marrë valë hidhet orizi ose makaronat e copëtuara; rregullohet me kripë, shtohen fasulet e ziera dhe vazhdon zierja, derisa supa të jetë gati. Në fund supa rregullohet me piper të zi e majdanoz të grirë hollë.

Për 4-5 persona duhen:

fasule 1/2 filxhan çaji, oriz 1 filxhan kafeje, qepë 1 kokërr, yndyrë 50 gr, domate 2 kokrra ose salcë 1/2 lugë, piper, majdanoz.

54. Supë perimesh me makarona ose oriz

Lëngun e mishit ose në ujë të vluar me kripë hidhen makarona ose oriz; pas 15 minutash shtohen patate të prera në kubikë të vegjël; mashurka, bizele të njoma dhe perime të kaurdisura (qepë, karota, selino, domate të freskëta). Të gjitha këto ziejnë së bashku për 10-15 minuta në zjarr të ngadalshëm, rregullohen me kripë, piper e majdanoz të grirë hollë.

Për 4-5 persona duhen:

oriz 1 filxhan kafeje ose makarona 1/2 filxhan çaji,

yndyrë 50 gr ose 1 filxhan patate 2-3 kokrra, qepë 1 kokërr, karota 2-3 copë, selino 1 kokërr (rrënjë), bizele të njoma 1/2 filxhan çaji, mashurka të njoma 8-10 copë, domate 2 kokrra, piper, kripë, majdanoz.

55. Supë perimesh me panxhar (borsh)

Në fillim përgatiten perimet: panxhari i kuq lahet, pastrohet dhe pritët në formë fijesh të holla, vendoset në një tenxhere me pak ujë dhe zien në zjarr të javashëm rreth 30 minuta. Në fund të zierjes shtohet uthull me qëllim që të forcohet ngjyra. Në tigan kaurdisen qepët, karotat dhe rrënjët selinoje të grira në formë fijesh; pastaj shtohen domate të qëruara nga cipa ose salcë domatesh. Në qoftë se supa bëhet pa lëng mishi d.m.th. me ujë, atëherë në fund të kaurdisjes, perimeve u hidhet pak miell, pastaj domatet ose salca. Sipas dëshirës së bashku me perimet mund të kaurdisen salçice ose proshutë e prerë në copa të vogla, të cilat përmirësojnë shijen e supës.

Në tenxhere me lëng mishi ose ujë të vluar hidhet lakra e bardhë e grirë në formë fijesh, pas 5 minutash patatet e prera në kubikë. Lihen të ziejnë 10 minuta dhe shtohen perimet e kaurdisura, kripë, piper, e fletë dafinë. Lihen të ziejnë derisa të jenë gati.

Pastaj supa hiqet nga zjarri, përzihet me panxharin e stufuar, shtohet uthull tjetër dhe rregullohet me majdanoz të grirë hollë. Supa është më e shijshme 3-4 orë pas përgatitjes, ose të nesërmen, vetëm se duhet të kihet parasysh që gjatë ngrohjes të mos vlohet, sepse humbet ngjyra e kuqe e panxharit.

Për 4-5 persona duhen:

lëng mishi ose ujë 1,5 litra, panxhar 2-3 kokrra, uthull 2-3 lugë, yndyrë 50 gr ose 1 filxhan kafeje, qepë 1 kokërr, karota 2-3 copë, selino 1 kokërr të vogël, domate 3 kokrra, lakër 250 gr, patate 2-3 kokrra, miell në rast nevojë 1 lugë kafeje, kripë, piper, majdanoz, 1 fletë dafinë.

Shënim: Në supën borsh mund të shtohen fasule të ziera, copa mishi të ziera dhe dhjamë derri të skuqur duke hedhur në fund të zierjes dhe hudhra.

56. Supë me lakër të freskët

Lakra e bardhë pritet në fije të holla ose në copa katrore. Zarzavatet e tjera priten në formë fijesh ose rripi, ndërsa patatet në kubikë mesatarë. Në lëngun e mishit ose në ujë të vluar hidhet lakra e prerë dhe pas 5 minutash vlimi shtohen patatet. Në tigan me yndyrë kaurdisen qepët, karotat, selinoja e grirë hollë, dhe pak miell. Pas kaurdisjes shtohen domatet ose salca dhe sëbashku hidhen në supë. Zarzavatet e kaurdisura hidhen 10 minuta para përfundimit të zierjes së supës. Në fund shtohet kripë, piper i zi, dafinë dhe majdanoz i grirë hollë. Kjo lloj supe është më e shijshme kur rri 4-5 orë, (por jo në zjarr).

Për 4-5 persona duhen:

lëng mishi 1,5 litra, lakër e freskët 500 gr, yndyrë 50 gr, patate 2-3 kokrra, karota 2 copë, qepë 1 kokërr, selino 1 kokërr, domate 2-3 kokrra, miell 1 lugë kafeje, kripë, piper, fletë dafine, majdanoz.

57. Supë me lakër turshi

Lakra turshi seleksionohet, lahet dhe po të jetë shumë e thartë mbahet 1-2 orë në ujë të ftohtë, shtrydhet dhe grihet hollë. Pastaj vendoset në një tenxhere të vogël, shtohet pak lëng mishi ose ujë, pak yndyrë, mbulohet me kapak dhe lihet të ziejë. Në një tenxhere tjetër kaurdisen qepët, karotat, selinoja, i shtohen domatet ose pak salcë, lëngu i mishit sa të marrë valë, patatet e prera në kubikë të vegjël dhe pas 10 minutash zierje hidhet lakra e stufuar.

Duhet të kihet parasysh se patatet nuk ziejnë në lëngun e lakrës turshi, prandaj duhet të ziejnë veç. Në rast se supa zihet pa patate, atëherë zarzavatet e kaurdisura

hidhen drejtpërdrejt në lakër së bashku me sasinë e lëngut të mishit ose të ujit të nevojshëm për supë. Në fund të zierjes supa rregullohet me kripë, piper, fletë dafine dhe majdanoz e kopër të grirë hollë.

Për 4-5 persona duhen:

lakër turshi 500 gr, patate 2-3 kokrra, karota 2-3 copë, selino 1 kokërr, domate 2-kokrra ose 1/2 lugë salcë, yndyrë 50 gr kripë, piper, fletë dafine e majdanoz i grirë hollë.

58. Supë me perime

Patatet, karotat, kungulleshkat, selinoja dhe mashurkat e njoma, pastrohen e priten në copa kubike mesatare; veç pastrohen bizelet e njoma kokërr.

Në tenxhere me yndyrë kaurdiset qepa, shtohen karotat, kungulleshkat, selinoja. Pas kaurdisjes shtohen domatet e freskëta të grira hollë ose pak salcë. Në perimet e kaurdisura hidhet lëng mishi ose uji i vluar dhe sa të marrin valën shtohen zarzavatet e tjera sipas kohës së zierjes. Në fillim mashurkat e bizelet, pastaj patatet. Supa lihet të ziejë 15-20 minuta, rregullohet me kripë, piper, fletë dafine dhe majdanoz të grirë hollë. Në rast se bizelet e mashurkat nuk janë shumë të njoma, ato, më parë duhet të ziejnë në ujë të vluar për disa minuta dhe pastaj t'i hidhen supës.

Për 4-5 persona duhen:

lëng mishi ose ujë 1,5 litra, patate 2-3 kokrra mesatare, karota 3-4 copë, kungulleshka 1 copë, bizele kokërr 1/2 gotë, mashkurka 8 copë, selino 1 kokërr, yndyrë 50 gr, qepë 1 kokërr, domate 2-3 kokrra ose salcë gjysmë luge, kripë, piper, majdanoz, dafinë.

59. Supë jeshile

Në një tenxhere kaurdisen qepë, karota, rrënjë selino, dhe pak miell, shtojmë lëng mishi ose ujë. Sa të marrë

valë hidhen patate të prera në copa kubike dhe zihen për 10 minuta. Pastaj shtohet lëpjetë ose spinaq i larë e i prerë në copa; rregullohet me kripë, piper, kopër e majdanoz të grirë hollë dhe me pak uthull. Është mirë që kur supa të vendoset në pjatë të hidhen vezë të ziera fort e të prera në katërsh.

Për 4-5 persona duhen:

lëng mishi ose ujë 1,5 litra, yndyrë 1 filxhan kafeje, qepë 1 kokërr, karota 2-3 copë, 1 rrënjë selino, miell 1 lugë kafeje, patate 2-3 copë, spinaq ose lëpjetë 300 gr, vezë 2 kokrra, 2 lugë gjelle uthull, kripë, piper, majdanoz e kopër.

60. Supë me lulëlakër

Të bardhat e preshëve priten në copa me gjatësi 2-3 cm dhe kaurdisen pak. Në lëng mishi ose ujë të vluar hidhen preshët e kaurdisur, lulëlakra e copëtuar në lule të veçanta, patatet e prera në kubikë dhe zihen 10-15 minuta. Në fund të zierjes shtohet kripë, piper, bizele të njoma të ziera veçan dhe rregullohen me majdanoz të grirë imët. Kjo supë sipas dëshirës mund të pritët me vezë e limon.

Për 4-5 persona duhen:

lëng mishi ose ujë 1,5 litra, lulëlakër 300 gr presh, 2-3 copë mesatare, patate 2-3 kokrra, bizele të ziera 1/2 gote, gjalpë 50 gr, ose vaj 1 filxhan kafeje, kripë, piper, majdanoz.

61. Supë me lakër bruksel

Lakra bruksel pastrohet nga gjethet e sipërme, përvelohet 2-3 minuta në ujë të vluar me kripë dhe kullohet. Në tenxhere me yndyrë, kaurdisen të bardhat e preshit të grira hollë së bashku me lakrën, hidhet lëng mishi ose ujë i vluar dhe patate të prera në copa të vogla, zihen derisa të jenë gati dhe rregullohen me kripë, piper e jeshillëqe.

Për 4-5 persona duhen:

lëng mishi ose ujë 1,5 litra, lakër bruksel 300 gr, preshtë 2-3 copë, patate 3-4 kokrra, vaj 1 filxhan kafeje, kripë, piper, kopër, majdanoz.

62. Supë peshku me perime

Patatet, karotat, mashurkat dhe selinoja, pastrohen e priten në copa kubike. Në tenxhere me vaj (mundësisht vaj ulliri) kaurdiset qepa e grirë hollë, pastaj shtohen karota, selino, mashurka, pak miell dhe pasi kaurdisen shtohen domate të freskëta të cilave u është pastruar lëkura. Lëngu i peshkut i përgatitur qysh më parë dhe i kulluar, i hidhet përzierjes dhe lihet të marrë valë, shtohen patatet dhe lihen të ziejnë rreth 10-15 minuta derisa të jenë gati. Gjatë zierjes hidhet një fletë dafinë. Supa rregullohet me kripë, piper e majdanoz. Gjatë vendosjes në pjatë hidhen copa tul peshku të ziera e të pas-truara nga halat.

Për 4-5 persona duhen:

lëng peshku 1,5 litra, patate 2-3 kokrra, karota 3-4 copë, mashurka 8-10 copë, selino, vaj 3-4 lugë gjelle, domate 2 kokrra, kripë, piper, majdanoz, dafinë.

63. Supë peshku me patate

Në lëngun e peshkut që zien hidhet orizi i pastruar e i larë. Në tigan me yndyrë kaurdisen qepë e karota të prera në copa kubike, shtohen domate ose salcë, kaurdisen së bashku dhe hidhen te orizi me patatet e prera në kubikë. Këto lihen të ziejnë derisa supa të jetë gati; rregullohen me kripë, piper dhe majdanoz të grirë hollë.

Për 4-5 persona duhen:

lëng peshku 1,5 litra, oriz një filxhan kafeje, qepë 1 kokërr, karota 2-3 copë, patate 3-4 kokrra, domate 2 kokrra, vaj 3-4 lugë gjelle, kripë, piper, majdanoz,

64. Paçe koke

Kokët pastrohen, copëtohen, vihen në ujë të ftohtë që të lahen e t'u ikë gjaku; pastaj vendosen në tenxhere mbulohen me ujë të ftohtë dhe vihen në zjarr. Kur të kenë marrë valë i hiqet shkuma dhe lihet të ziejë në zjarr të javashëm, duke i hedhur qepë, karota, selino, kripë, piper, dafinë dhe majdanoz. Lihen derisa të jenë zier mirë d.m.th. kur mishi të ndahet lehtë nga kocka. Kullohet, qërohet mishi nga kocka dhe pritët në copa kubike të vogla. Në tenxhere hidhet yndyrë, pak salcë dhe lëngu i marrë nga zierja e kokës. Kur lëngu të ketë marrë valë shtohet mishi i zier, pak spec i kuq dhe lihen të ziejnë në zjarr të javashëm edhe për disa minuta duke i hedhur kripë e piper të zi. Në fund paçes i hidhen hudhra të shtypura me uthull.

Për 4-5 persona duhen:

lëng koke 1 litër (kokë 1 kg), dhjamë ose gjalpë 50 gr ose 1 filxhan kafeje, miell 1 lugë kafeje, spec djegës 1/2 lugë kafeje, kripë, piper, uthull 2-3 lugë, hudhra 4-5 thelpinj, 1 qepë, karrota 2-3 copë, selino, majdanoz.

65. Paçe këmbësh.

Këmbët pastrohen, thyhen me hanxhar (sidomos kyçet) dhe vendosen në ujë të ftohtë për 1-2 orë që t'i largohet era karakteristike. Këmbët e lara vendosen në tenxhere me ujë të ftohtë dhe vihen të ziejnë. Pasi të marrin valë, hiqet shkuma dhe vazhdon zierja në zjarr të javashëm duke shtuar qepë, karota, selino, piper të zi të bluar, dafinë dhe kripë. Mundësisht qepa më parë të piqet në pllakë të sobës. Zierja vazhdon derisa mishi të shkëputet nga kocka, pastrohen mishrat, priten në copa dhe lihen në një anë. Në një tenxhere ku kemi hedhur dhjamë ose gjalpë, kaurdisen mishrat, shtohet lëngu i tyre, lihen të marrin valë, hidhet pak spec djegës dhe gjatë vendosjes në pjatë hidhen hudhra të shtypura me uthull, dhe piper i zi. Paça mund të përgatitet edhe e përzier

me kokë e këmbë bashkë. Në këtë rast bëhet edhe më e shijshme.

Për 4-5 persona duhen:

Lëng këmbë 1 litër, këmbë lope 2 copë, këmbë të bagëtive të imta 10-12 copë, dhjamë ose gjalpë 50 gr, sepc djegës 1/2 lugë kafeje, kripë, piper, hudhra 4-5 thelpinj, uthull 2-3 lugë gjelle, qepë 1 kokërr, karota 2-3 copë, selino 1 rrënjë.

66. Paçe plënci, me vezë e limon

Plënci lahet me ujë të ftohtë, përvëlohet me ujë të vluar për 30 sekonda, pastrohet nga shtresa e brendshme derisa të zbardhet, lahet mirë dhe vendoset në ujë të ftohtë për t'u zier. Gjatë zierjes, hidhen perime aromatike, qepë të pjekura mbi sobë, karota, rrënjë selino, kripë dhe piper.

Pasi këto të kenë zier, plënci pritët në copa të vogla dhe përgatitet paçja. Për këtë, në një tenxhere hidhet yndyrë dhe pasi ajo të jetë nxehur shtohet miell, kaurdiset derisa të zverdhët pak dhe pastaj shtohen plëncat e zier. Kaurdisen përsëri së bashku dhe hidhet lëng i kulluar nga zierja e plëncave. Lihen të ziejnë në zjarr të javashëm për 10-15 minuta. Në fund rregullohen me vezë e limon. Në një enë porcelani rrihen vezët, hollohen pak e nga pak me lëngun e paçes, shtohet limon ose limontoz i tretur në ujë dhe hidhen te paçja. Gjatë vendosjes nëpër pjata paçes mund t'i hidhet sipas dëshirës piper i zi.

Për 4-5 persona duhen:

Plënca 1,5 kg, dhjamë ose gjalpë 50 gr, miell 1 lugë gjelle, vezë 1 kokërr, qepë 1 kokërr, karota 2-3 copë limon 1/2 kokërr mesatare ose 1/2 lugë kafeje limontoz, piper i zi, kripë.

67. Paçe plënci me salcë

Plënci pastrohet dhe vihet të ziejë njëlloj si më sipër. Në një tenxhere me yndyrë kaurdiset miell, i shtohet pak

salcë dhe hidhet lëngu i fituar nga zierja e plëncave. Kur lëngu të marrë valë shtohen plëncat e zier të grirë në copa të vogla, pak spec i kuq, dhe lihen të ziejnë në zjarr të javashëm për disa minuta, duke i hedhur kripë e piper të zi. Gjatë ndarjes në pjata paçes i hidhen hudhra të shtypura me uthull.

Për 4-5 persona duhen:

lëng plënci 1 litër, plënca 1,5 kg, dhjamë ose yndyrë 50 gr, miell 1 lugë kafeje, salcë 1/2 lugë kafeje, spec, kripë, karota 2-3 copë, uthull 2-3 lugë, hudhra 4-5 thelpinj, qepë 1 kokërr, selino, majdanos.

b) SUPA TË KTHJELLËTA

Supa e kthjellët përgatitet me lëng mishi, shpendësh ose peshku. Pjesa kryesore e këtyre supave është lëng, i cili duhet të jetë i pasur me lëndë ekstraktive dhe i kthjellët. Lëndët ekstraktive janë: lëndët e shijes që lëshon mishi ose kockat gjatë zierjes. Që lëngu të dalë i kthjellët, duhet të kemi kujdes që të vlojë shumë ngadalë dhe në mes të vlimit të shtohen patjetër rrënjë aromatike si: qepë të pjekura mbi sobë, karota, selino, piper, dafinë dhe herë pas here gjatë zierjes i hiqet shkuma dhe yndyra që del në sipërfaqe. Yndyra hiqet sepse gjatë zierjes ajo emulgohet me ujin dhe e turbullon atë.

Lëngu i mishit i kthjellët duhet të jetë shumë më i pasur në lëndë ekstraktive nga lëngu i zakonshëm; për këtë, mishi i shpendit ose kockat zihen në sasi të vogël uji, në raport, afërsisht 1:2 ose 1:3. Lëngu i përgatitur kullohet në pece (napë) të pastër, ngrohet deri në vlim dhe jepet ashtu, thjesht duke e shoqëruar me ndonjë copë byrek, bukë të skuqur, oriz të zier, fidhe të ziera etj.

Në rast se lëngu i kthjellët përgatitet në sasi të madhe si p.sh. për raste festash, atëherë ai duhet të pastrohet e të pasurohet me lëndë ekstraktive. Për këtë

mishi i lopës i marrë nga pjesa e muskulit të këmbës ose qafa, grihet në makinë, përzihet me ujë të ftohtë në raportin 1:1 p.sh. për 1 litër lëng mishi merret 100 gr. mish dhe 100 gr ujë, shtohen të bardhat e vezëve, kripë dhe lihen për 1 orë. Pas 1 ore, kjo masë hidhet në lëngun e mishit të ftohur, përzihet dhe vendoset në zjarr. Përsëri shtohen qepë të pjekura, karota, rrënjë selino e majdanoz, dafinë e piper kokërr. Vlohet në zjarr shumë të javashëm rreth 1 orë derisa shkuma e trashë të bjerë poshtë. Lëngu i gatshëm kullohet me napë të pastër në një tenxhere tjetër në mënyrë që shkuma të ngelet në tenxheren e parë. Lëngu i kthjellët ndryshe quhet dhe konsomè. Sipër lëngut të kthjellët nuk duhet të ketë yndyrë; këtë e heqim me lugë ose letër.

c) SUPA KREM

Supat krem bëhen me perime, oriz, leguminoze (fasule, bizele thjerëza), me shpendë shtëpiakë dhe të egër, si dhe me mish viçi e mëlçi. Produktet zihen derisa të jenë gati, pastaj kalohen në sitë, dhe në formë pureje hidhen në lëngun e mishit. Produktet që copëtohen me vështirësi më parë i kalojmë në makinë mishi dhe pastaj në sitë ose në makinë shtrydhëse. Supa në fund të zierjes rregullohet me salcë të bardhë (beshamell) dhe me të verdhat e vezëve. Gjatë ndarjes, në supat krem mund të hidhet pak garniturë p.sh. në supën krem me lulëlakër mund të shtohen koçanë të vegjël të lulëlakrës të zier veç, në supën krem me perime, mund të hedhim perime të ziera të prera në kubikë të vegjël ose në vend të garniturës të hidhet bukë e prerë në copa kubike, e tharë në furrë dhe e spërkatur me gjalpë.

68. Supë krem-patate

Në tenxhere me yndyrë mundësisht me gjalpë, kaurdisen qepët, karotat dhe pak miell; këtyre u shtohet lëng mishi ose ujë. Pasi të marrin valë hidhen patate të prera

në kubikë të mëdhenj. Lihen në zjarr të javashëm derisa të jenë zier, pastaj supa kalohet në kullesë, duke shtypur perimet me lugë, vihet përsëri në zjarr që të marrë një valë. Në tas porcelani rrihen të verdhat e vezëve ose vezët komplet, dhe duke i rrahur shtohet pak e nga pak qumësht i nxehtë; kjo përzierje hidhet në supë. Pasi është rregulluar me vezë supa nuk vihet në zjarr sepse veza mpikset. Gjatë vendosjes në pjata supës mund t'i hidhet kruton dhe piper i zi i bluar, si dhe pak gjalpë i freskët. Për kruton merret buka bajate, pritët në copa kubike, spërkatet me gjalpë dhe piqet në furrë, ose skuqet në tigan derisa të thahet. Nganjëherë mund të gatuhet dhe në mënyrë tjetër: mielli nuk hidhet te zarzavatet, por zverdhët veç me pak gjalpë. Shuhet me qumësht (salcë e bardhë) dhe bashkohet me supën.

Për 4-5 persona duhen:

lëng mishi ose ujë 1,5 litra, gjalpë 50 gr ose 1 lugë gjelle, qepë 1 kokërr, karota 2-3 copë, miell 1 lugë gjelle, patate 4-5 kokrra, vezë 1 kokërr, qumësht 1 filxhan çaji, 1 fetë bukë, kripë, piper.

69. Supë krem — karota

Në tenxhere me yndyrë kaurdisen qepët, selinoja, hidhet lëng mishi ose ujë i vluar, dhe lihen derisa të marrin valë. Shtohen karotat e pastruara e të prera në copa të mëdha dhe lihen të ziejnë derisa të jenë gatë. Pastaj i kullohet lëngu, ndërsa zarzavatet kalohen në kullesë të shpeshtë, shtypen me lugë dhe herë pas here i hidhet pak lëng nga ai ku u zien. Në tenxhere me gjalpë kaurdiset mielli, por jo sa të marrë ngjyrë. Ai përziehet shpejt me qumësht dhe vihet të ziejë që të krijohet një masë e trashë pa kokrra (salca e bardhë). Në këtë salcë hidhet pak e nga pak supë, përziehet mirë, vihet në zjarr dhe pasi merr një valë rregullohet me të verdhat e vezëve, ashtu si supa krem-patate. Gjatë vendosjes në pjata hidhet kruton, pak gjalpë si dhe piper i zi.

Për 4-5 persona duhen:

lëng mishi ose ujë 1,5 litra, karota 500 gr, qepë 1 kokërr, selino 1 kokërr, gjalpë 50 gr, qumësht 1 filxhan çaji, vezë 1 kokërr, fetë buke 1 copë, kripë, piper i zi, miell 1 lugë gjelle.

70. Supë krem-domate

Karotat, qepët, rrënjët e selinosë priten hollë dhe kaurdisen me gjalpë, shtohen domate të prera në copa të mëdha, pas pak lëng mishi ose ujë i nxehtë dhe kripë. Lihen të ziejnë 10-15 minuta dhe kalohen në sitë ose kulesë duke i shtypur me lugë druri. Supa përziehet me salcën e bardhë e cila është e përgatitur me miell të kaurdisur dhe qumësht. I jepet një valë dhe hiqet nga zjarri, në fund rregullohet me të verdhat e vezëve të rrahura me qumësht e gjalpë të freskët. Gjatë ndarjes në pjata supës i hidhet kruton e piper.

Për 4-5 persona duhen:

lëng mishi ose ujë 1,5 litra, domate 500 gr, gjalpë 50 gr, karota 2-3 copë, qepë 1 kokërr, selino 1 rrënjë e vogël, miell 2 lugë gjelle, qumësht 1 filxhan çaji, vezë 1 kokërr, 1 fetë bukë, kripë, piper.

71. Supë krem-perime

Patatet e qëruara të prera, bizelet dhe mashurkat e njoma të copëtuara i hedhim në lëng mishi dhe i ziejmë. Pas 10 minutash hedhim perime të kaurdisura si qepë, karota, selino. Pasi të jenë zier të gjitha kalohen në sitë ose në kulesë duke i shtypur me lugë druri. Veçan përgatitet salca e bardhë me miell të kaurdisur dhe e përzier me qumësht e lëng mishi. Përzihen me supën dhe lihen të ziejnë 5 minuta. Supa hiqet nga zjarri dhe rregullohet me të verdhat e vezëve, gjalpë të freskët e piper të zi. Gjatë vendosjes në pjata hidhet edhe bukë e thekur-kruton.

Për 4-5 persona duhen:

lëng mishi ose ujë 1,5 litra, patate 2-3 kokrra, karota 2-3 copë, bizele kokërr 1/2 filxhan çaji, mashurka 8-10 copë, qepë 1 kokërr, selino 1 kokërr e vogël, gjalpë 50 gr, miell 1 lugë gjelle, qumësht 1 filxhan çaji, vezë 1 kokërr, 1 fetë bukë, kripë, piper.

72. Supë krem-spinaq

Qepët dhe karotat e grira hollë kaurdisen me gjalpë. Spinaqi pastrohet e lahet në ujë të bollshëm, dhe zihet në lëng mishi ose në ujë të vluar, duke hedhur dhe zrazavatet e kaurdisura. Lihen të ziejnë 10-15 minuta dhe kalohen në sitë ose kullësë. Veçan përgatitet salca e bardhë (si më sipër) dhe përzihet me supën; vihet të ziejë edhe 2-3 minuta. Pastaj, rregullohet me vezë të rrahura e me qumësht. Gjatë vendosjes në pjata hidhet gjalpë i freskët dhe kruton.

Për 4-5 persona duhen:

lëng mishi ose ujë 1,5 litra, spinaq 750 gr, qepë 1 kokërr, karota 2-3 copë, miell 1 lugë gjelle, qumësht 1 filxhan çaji, vezë 1 kokërr, kripë, 1 fetë bukë, gjalpë 50 gr.

73. Supë krem me qofte të vogla

Mishi i bagëtive të imta ose i vëçit kalohet 2 herë në makinë së bashku me qepët. Në masën e mishit hi-dhet kripë, piper i zi i bluar, majdanoz i grirë hollë, të bardhat e vezëve dhe pak oriz gjysmë i zier. Të gjitha këto përzihen dhe ndahen në kokrra të vogla të rrumbullakta me madhësi sa një kokërr ulliri. Duhet patur parasysh që të mos hidhet oriz më tepër sesa duhet, pse gjatë zierjes qoftet hapen. Qoftet e përgatitura kaurdisen pak me gjalpë, shtohet ujë i vluar (aq sa nevojitet për supën) dhe lihet të ziejnë 10-15 minuta. Në një tenxhere tjetër kaurdiset pak miell me gjalpë, shtohet qumësht dhe lëngu i qofteve. Përzihen shpejt, që të mos krijohen kokrriza;

llohen, shpëlahen, kullohen përsëri mirë dhe hidhen në tavë, shtohet djathë i bardhë i thërmuar, një pjesë e gjalpë, vezë, pak qumësht, piper i zi dhe të gjitha këto përzihen mirë, shtrohen në tepësi të lyer me yndyrë; përsipër hidhet salca e bardhë ose rrihen vezët me qumësht. Sipër pastiçoja spërkatet me gjalpë e djathë kaçkavall dhe piqet në furrë për 25-30 minuta.

Për 4-5 persona duhen:

makarona 300 gr, vezë 2 kokrra (1 të verdhë për salcën e bardhë), djathë të bardhë 100 gr, qumësht 1 1/2 filxhan çaji, kripë, piper, gjalpë 2 lugë gjelle, miell 2 lugë gjelle, kaçkavall të grirë 1 lugë gjelle.

81. Pastiço me kimë

Makaronat ziejnë një lloj si për pastiço me djathë, kullohen, shpëlahen kullohen përsëri mirë dhe hidhen në tavë; përzihen me kimë, shtrohen në tavë të lyer me yndyrë, rrafshohen dhe mbulohen me salcë të bardhë e përgatitur me miell të kaurdisur me gjalpë dhe qumësht. Sipër spërkatet me gjalpë dhe sipas dëshirës me djathë të bardhë ose kaçkavall. Piqet në furrë për 25-30 minuta dhe ndahet në copa.

Kima përgatitet si për byrek me petë të ziera.

Për 4-5 persona duhen:

makarona 300 gr, mish i grirë 200 gr, qepë 2 kokrra, yndyrë 3-4 lugë gjelle, salcë 1 lugë gjelle, kripë, piper, dafinë.

Për salcën e bardhë duhen: miell 2 lugë gjelle, qumësht 1 gotë, vezë 1 kokërr, gjalpë 1 lugë gjelle.

82. Pilaf me gjalpë

Orizi pastrohet, lahet, kullohet dhe skuqet në yndyrë të nxehtë, pastaj hidhet lëng mishi ose ujë i vluar, kripë, mbulohet dhe lihet në zjarr të javashëm 15-20 mi-

nuta. Pasi të ketë pirë gjithë lëngun dhe në sipërfaqe të jenë krijuar vrima, hiqet nga zjarri, lihet i mbuluar me kapak për 10-15 minuta sepse avulli e zbut dhe shkriftohet më mirë. Në kushtet e shtëpisë pilafi i porsahequr nga zjarri mund të mbështillet me një copë të trashë të shtruar nga brenda me letër dhe të mbahet në gjendje të nxehtë deri në momentin e ngrënies. Gjatë hedhjes në pjatë pilafit mund t'i hidhet gjalpë i shkrirë ose salcë domatesh e përgatitur si për makarona. Gjithashtu mund të bëhet edhe me kimë dhe në këtë rast përgatitet njëlloj si më sipër.

Pilafi mund të bëhet edhe pa e kaurdisur orizin; në këtë rast përdoret vetëm gjalpë.

Në lëngun e mishit ose në ujë të vluar me kripë në sasi të caktuar, hidhet orizi i pastruar e i larë, përzihet pak dhe mbulohet me kapak; lihet të ziejë në zjarr të javashëm për 10-15 minuta dhe kur të ketë pirë gjithë lëngun e në sipërfaqe të krijohen vrima, hidhet gjalpë i shkrirë, përzihet, mbulohet me kapak dhe lihet në anë të sobës, ose mbështillet me copë të trashë si më sipër, sidomos në kohën kur nuk ndizet soba. Gjatë vendosjes në pjatë hidhet piper i zi i bluar.

Për 4-5 persona duhen:

oriz 2 filxhanë çaji, lëng mishi ose ujë 4 filxhanë, gjalpë 2 lugë gjelle, kripë, piper.

83. Pilaf me fasule

Pilafi bëhet si më sipër por gjatë vendosjes në pjatë, i hidhen dhe fasule të përgatitura dhe sipas dëshirës piper i zi i bluar.

Për 4-5 persona duhen:

oriz 2 filxhanë çaji, lëng mishi ose ujë 4 filxhanë, gjalpë 50 gr, kripë, piper, fasule të gatshme 1 gotë çaji.

84. Petë tigani me kimë

Në një enë porcelani rrihen vezët, shtohet qumësht ose ujë dhe pak sheqer, hidhet miell i situr i përzier me pak sodë, dhe zihet një brumë i hollë që të derdhet lehtë nga luga. Në tigan të nxehtë lyer me yndyrë, hidhet pak brumë, duke luajtur tiganin brumët hapet në gjithë sipërfaqen e tij me trashësi 3-4 mm, piqet nga njëra anë dhe kthehet nga ana tjetër. Petët e pjekura vendosen njëra mbi tjetrën në një pjatë të cekët.

Ndër kohë përgatitet kima për mbushje. Në tigan me yndyrë të nxehtë kaurdiset qepa e prerë në formë kubike të vogla; pas kaurdisjes shtohet mishi i grirë, përzihet duke e mbajtur në zjarr për 10 minuta derisa të avullojë lëngu dhe të mbetet me yndyrën e vet. Shtohen domatet e qëruara e të grira ose salcë. Përzihen së bashku, hidhet kripë, piper, dafinë, pak ujë dhe lihen në zjarr të javashëm për 10-15 minuta, derisa të avullojë lëngu. Në mes të petës vendosen 1-2 lugë kimë, mblidhet në formë roleje duke futur anët brenda, dhe vihet në tavë me korent. Spërkaten me gjalpë e djathë kaçkavall dhe piqen 10-15 minuta. Në mungesë të furrës ose tavës me korent, këto mund të skuqen lehtë nga të dyja anët. Vendosen në pjatë dhe spërkaten me gjalpë. Kima për mbushje mund të bëhet edhe pa salcë.

Për 4-5 persona duhen:

miell 1 filxhan çaji, qumësht ose ujë 2 filxhanë çaji, vezë 1-2 kokrra, kripë 1/2 lugë kafeje, sheqer, pak sodë, vaj për të lyer tiganin 4-5 lugë gjelle.

Për kimën duhen: mish 250 gr, qepë 2 kokrra, yndyrë 4-5 lugë gjelle, domate 3-4 kokrra ose salcë 1 lugë gjelle, kripë, piper, 1 fletë dafine, kaçkavall i grirë 1 lugë gjelle.

85. Petë tigani me spinaq

Përgatiten petët njëlloj si më sipër, vendosen në pjatë njëra mbi tjetrën dhe pastaj mbushen me spinaq.

Spinaqi pastrohet nga gjethet e dëmtuara, lahet disa herë në ujë të bollshëm, kullohet, dhe përvëlohet 2-3 minuta në ujë të vluar me kripë; kullohet, shtrydhet dhe pritët. Në tigan me yndyrë të nxehtë kaurdisen qepë të grira hollë, mbi to hidhet spinaqi, shtohet kripë, piper dhe përzier mirë. Në zjarr lihet 2-3 minuta duke e përzier vazhdimisht. Hiqet nga zjarri dhe, sipas dëshirës, mund të shtohet djathë i thërmuar. Petët e mbushura me spinaq mbështillen mirë në formë roleje, piquen në furrë ose skuqen në tigan.

Për 4-5 persona duhen:

miell 1 filxhan çaji, qumësht ose ujë 2 filxhanë çaji, vezë 1-2 kokrra, kripë 1/2 lugë kafeje, sheqer, pak sodë, vaj për të lyer tiganin 2-3 lugë gjelle. Për mbushje duhen spinaq 1 kg, yndyrë 4-5 lugë gjelle, qepë 1 kokërr, kripë, piper, pak djathë të bardhë.

86. Petka të mbushura me mish

Në mes të miellit të situr hidhen vezët, kripë e pak ujë dhe zihet brumi njëlloj si për petët me dorë, mbulohet me pecetë të lagur dhe lihet 15-20 minuta.

Ndërkohë përgatitet mbushja: mishi i lopës dhe i derrit të përzier sëbashku, pritët në copa të vogla, grihet 2-3 herë në makinën e mishit së bashku me qepët, shtohet kripë e piper i zi i bluar; në qoftë se mishi nuk është shumë i dhjamur, shtohet pak gjalpë i freskët, ujë dhe përzihen mirë. Nga brumi i përgatitur hapen petët me trashësi 2-3 mm.

Mishi i përgatitur ndahet në toptha të vegjël me madhësi sa një kokërr ulliri dhe vendosen në fillim të petës me 2,5 cm largësi njëra kokërr nga tjetra. Topthat duhet të vendosen në një rresht dhe të mbulohen me petë; ndërmjet topthave peta shtypet pak me gisht dhe me një gotë uji të vogël pritët në formë gjysmëhënëze. Çdo copë ngjitet edhe njëherë mirë me gishta që të mos hapet gjatë zierjes. Peta e mbetur drejtohet me thikë dhe vendoset përsëri një rresht tjetër me toptha mishi. Kë-

shtu vazhdohet derisa mbarohen petët. Këto mund të bëhen dhe në mënyrë tjetër: petët e hapura priten me një gotë vere në copa të rrumbullakëta me diametër rreth 4 cm. Në mes të çdo cope vendosen topthat e mishit të përgatitur, mbulohet mishi duke e palosur petën përgjysmë në mënyrë që të krijohet gjysmëhënëze; shtypen me gisht që petët të mos hapen gjatë zierjes. Petkat e mbushura hidhen në ujë të vluar me kripë dhe zihen 10-15 minuta, kullohen vendosen në pjatë dhe sipër u hidhet gjalpë i shkrirë. Sipas dëshirës, veçan mund të jepet edhe pak uthull që gjatë ngrënies secila kokërr mund të njo-met me të. Në rast se petkat janë zier më përpara dhe janë ftohur ato ringrohen në tigan me gjalpë.

Petkat e mbushura mund të bëhen dhe me salcë domatesh si makaronat.

Për 1 kg petka të mbushura

Për brumin duhen: miell 2 gota uji, vezë 2 kokrra, gjalpë 2 lugë gjelle, ujë 2 filxhanë kafeje, kripë 1/2 lugë kafeje. Për mbushje duhen: mish lope ose derri 200 gr, qepë 2 kokrra, kripë 1/2 lugë kafeje, 1 filxhan kafeje ujë dhe piper.

87. Petulla me kos

Në një tas porcelani ose plastmasi vendosen vezë, kos, kripë dhe pak sheqer, (sipas dëshirës mund të hidhet dhe yndyrë) rrihen mirë dhe shtohet miell i përizer me pak sodë. Brumi në këtë rast është gjysmë i trashë. Në tigan hidhet pak yndyrë (1/2 lugë gjelle), kur yndyra të jetë nxehur, hidhet brumi (një lugë gjelle për çdo petull). Largësia nga njëra-tjetra duhet të jetë 3-4 cm sepse gjatë skuqjes brumi hapet. Petullat skuqen nga njëra anë dhe pastaj kthehen nga ana tjetër. Pasi të jenë skuqur mirë vendosen në pjatë, spërkaten pak me gjalpë dhe mund të përdoren kështu, siç janë, ose me sheqer, mjaltë, reçel, kos, qumësht, çaj sipas dëshirës.

Për 4-5 persona duhen:

miell 2 gota uji, kos 1 gotë uji, vezë 1 kokërr, kripë,

sheqer 1 lugë kafeje, sodë 1/2 lugë kafeje, vaj 2 filxhanë kafeje.

88. Petulla të mbushura

Mielli i situr përzihet me sodë, në mes të tij hapet një gropë ku hedhim vezë, ujë, kripë, pak sheqer, kos dhe vaj. Në mungesë të kosit mund të hidhet ujë me pak limontoz. Duke filluar përzierjen nga mesi, zihet një brumë pak më i fortë se ai i petullave që u përmendën më sipër, por jo dhe shumë i fortë. Brumi nuk duhet të punohet shumë, që të mos ulet dhe të mos bëhet elastik. Brumin e ndajmë në dy pjesë; secilës i jepet forma e bastunit dhe pritet në copa rreth 50 gr. Çdo copë punohet në formë topi dhe hapet në petë të rrumbullakta, në tavolinën e spërkatur me miell. Në mes të petës vendoset mbushja (1 lugë gjelle), e cila mbulohet duke e mbështjellë petën përgjysmë. Anash shtypet me gisht, përmbysset me palosjen poshtë dhe shtypet pak nga sipër duke i dhënë formën ovale. Këto vihen në tavolinë ku është hedhur mielli.

Në tigan me yndyrë të nxehtë vendosen petullat njëra pranë tjetrës; dhe pasi skuqen nga njëra anë kthehen nga ana tjetër. Petullat e skuqura vendosen në tas dhe mbulohen me pecetë të palosur në trish ose katërsh me qëllim që të zbuten pak.

Mbushja e këtyre petullave mund të bëhet me marmalatë, me mollë të grira dhe të përziëra me sheqer e pak kanellë, me mish të grirë të skuqur bashkë me qepë, kripë e piper, ose me qepë e vezë të ziera.

Për këto të fundit qepët e njoma grihen hollë dhe skuqen të mbuluara me kapak derisa zbuten, hiqen nga zjarri dhe përzihen me vezë të ziera të grira hollë, kripë, piper e kopër.

Për 4-5 persona duhen:

miell 3 filxhanë çaji, kos 1/2 filxhan çaji, vezë 1 kokërr, sheqer 1 lugë kafeje, sodë 1/2 lugë kafeje, vaj

1 filxhan, kripë.

Për mbushjen: qepë 500 gr, vezë 2 kokrra, vaj për të skuqur 4-5 lugë gjelle, kripë, piper, kopër.

Shënim: Petullat e mbushura, ashtu si petullat e zakonshme është mirë të bëhen me maja birre. Në mungesë të saj brumi përgatitet dhe me kos e sodë dhe petullat fërgohen afërsisht si me maja.

89. Petulla të mbushura me lakër

Brumi përgatitet njëloj si për petullat me qepë, në mes të petës vendoset mbushja prej lakre, mbliidhet në formë gjysmëhënëze, ngjiten mirë anët e petës, i jepet forma e sheshtë dhe pastaj skuqen nga të dyja anët ose piquen në furrë.

Për mbushje, lakra e bardhë pastrohet dhe grihet në fije të holla. Në tenxhere ose tigan të thellë nxehet yndyra, i hidhet lakra, e cila, përzihet dhe mbulohet me kapak. Pas pak hiqet kapaku përzihet përsëri dhe mbahet mbuluar edhe 10 minuta të tjera derisa të zbutet. Në lakrën e përgatitur e të ftohur hidhet kripë e piper dhe sipas dëshirës, mund të shtohen edhe vezë të ziera të grira.

Për 25 copë petulla me peshë afërsisht 75 gr secila duhen:

për brumin: miell 900 gr sheqer 1 lugë gjelle, vaj 2 filxhanë kafeje, vezë 2 kokrra, kripë 1 lugë kafeje, kos 2 filxhanë çaji ose në mungesë të kosit 2 filxhanë ujë dhe 1 lugë kafeje jo plot me limontoz, sodë 1 lugë kafeje, vaj për skuqje 1 gotë uji ose për të lyer tavën gjatë pjekjes 1 lugë kafeje.

për mbushjen: lakër 1 kg, vezë 2 kokrra, vaj 1 filxhan kafeje, kripë, piper.

90. Byrek me spinaq

Për byrekë preferohet miell i fortë (miell që përmban gluten më tepër dhe ka elasticitet).

Në tavolinë ose tepsi hidhet miell, në mes hapet një

gropë ku hidhet ujë me pak kripë. Për 1 kg miell merret 550-600 gr ujë megjithëse kjo varet nga lagështira e miellit. Duke e përzier nga mesi, zihet një brumë i fortë, i cili punohet 10 minuta, ndahet në kuleçë, mbulohet me picetë të lagur dhe lihet 20-30 minuta që të zbuten proteinat dhe të fitojë elasticitet; në këtë mënyrë petët do të hapen më mirë. Nga çdo kulaç bëhen petë të vogla, secila prej tyre spërkatet me niseshte dhe vendosen 3-4 copë njëra mbi tjetrën pastaj hapen petët e zakonshme. Këto shihen herë pas here që të mos ngjiten me njëra-tjetrën dhe i hidhet nga pak niseshte.

Në tepsi të lyer me yndyrë shtrohet gjysma e petëve, duke i spërkatur secilën me yndyrë, mbi to shtohet mbushja dhe mbulohet me pjesën tjetër të petëve të spërkatura me yndyrë. Anët mbështillen nga brenda. Byreku spërkatet me yndyrë dhe piper.

Spinaqi për mbushje pastrohet, lahet në ujë të bollshëm dhe përvëlohet 2-3 minuta në ujë të vluar me kripë; kullohet duke e shtrydhur pak, pritët dhe përziehet me djathë të thërmuar e vezë, shtohet kripë, piper dhe shtrohet në byrek.

Spinaqi mund të përgatitet dhe në këtë mënyrë: në tigan me yndyrë skuqet qepa e grirë hollë, shtohet spinaqi i përvëluar i grirë, kripë, piper, kopër dhe pak djathë.

Për 4-5 persona duhen:

miell 3 gota uji (500 gr), ujë 300 gr (6 filxhanë kafeje), kripë.

Për mbushje — spinaq 1 kg, vezë 1 kokërr, djathë 100 gr, vaj 1/2 filxhan çaji, kripë, piper.

91. Byrek me presh e qumësht

Ky lloj byreku përgatitet njëllë si me spinaq, por për mbushje merret preshi. Ai pastrohet, lahet grihet hollë dhe skuqet me yndyrë mbuluar me kapak. Që të zbutet pak shtohet qumësht, lihet të ziejë dhe 10 minuta të tjera, avullon lëngu i tepërt, hiqet nga zjarri përziehet me vezë, piper të zi e kripë.

Për 4-5 persona duhen:

miell 3 gota uji (500 gr), ujë 300 gr. (6 filxhanë kafeje), kripë.

Për mbushje — presh 1 kg, vezë 1 kokërr, qumësht 1/2 filxhan çaji, kripë, piper, vaj gjysmë filxhan çaji.

92. Byrek me kuleçë të vegjël të pjekur në tavë me korent ose në sobë

Për të bërë një byrek të vogël në tavën me korent merren 3 filxhanë kafeje ujë, 1 filxhan kafeje me vaj, hidhen në tas, shtohet kripë hidhet miell i situr rreth 2 gota uji dhe zihet brumi i fortë si për byrek të zakonshëm. Brumi punohet mirë, lihet për 10 minuta, ndahet përgjysmë, secila pjesë ndahet në 10 kuleçë të vegjël sa një kokërr arrë. Çdo kulaç hapet në petë të vogla me diametër 10-12 cm, secila petë lyhet me vaj ose vaj të përzier me dhjamë, (sipas dëshirës mund të hidhet dhe gjalpë). Petët vendosen 5 e nga 5 mbi njëra-tjetrën shtypen pak me dorë dhe hapen me okllai (petës) ose me shishe me madhësinë e tavës me korent. Një petë që ka 5 shtresa vendoset në tavë të lyer me yndyrë, spërkatet me vaj, mbi të vendoset një petë tjetër, hidhet mbushja, rrafshohet, mbulohet me një petë pesështresëshe, spërkatet me yndyrë dhe vendoset peta e fundit, përsëri spërkatet me yndyrë dhe vihet për t'u pjekur. Zakonisht pjekja zgjat 15 minuta, pastaj byreku kthehet nga ana tjetër dhe piqet 5 minuta të tjera. Mbushja vihet sipas dëshirës: me djathë e vezë, me gjizë e vezë, me presh, me spinaq, me kungull etj.

93. Pispili me lakra (miell misri) (shapkat)

Lakrat e egra, në mungesë të tyre spinaqi, pastrohen, lahen, grihen hollë dhe shtypen në një tepsi me vaj, kripë, kopër dhe një pjesë miell misri. Në tavën e lyer me yndyrë hidhet një shtresë miell misri, sipër shtrojmë lakrat e përgatitura, i sheshojmë, hedhim përsëri një shtresë miell misri, i spërkatim me ujë, yndyrë dhe e pje-

kim derisa të krijohet në sipërfaqe një kore e kuqe. Gjatë ngrënies mund të shoqërohet me kos. Jepet e ngrohtë.

Për 4-5 persona duhen:

lakra ose spinag 1 kg, miell misri 2 gota uji, vaj 2 filxhanë kafeje, erëza, kripë.

94. Lakror me miell misri

Mielli i misrit i situr hidhet në tenxhere me ujë të vluar me pak kripë dhe përziehet derisa të bëhet një llapë e trashë. Hiqet nga zjarri dhe shtrohet në tavë të lyer me yndyrë. Mbi këtë shtrohet mbushja e përgatitur si për byrek me spinag; sipër hidhet një shtresë e hollë miell misri, spërkatet me ujë e yndyrë dhe piqet.

Për 4-5 persona duhen:

miell misri 2 gota uji, ujë 2 gota, pak kripë, spinag 1 kg, miell misri për të hedhur sipër 1 filxhan kafeje, pak ujë, vaj 2-3 lugë gjelle.

95. Supë krem me miell misri

Në një enë me yndyrë (mundësisht gjalpë) kaundiset mielli i misrit i situr (por të mos marrë ngjyrë), e shuajmë me lëng mishi duke e përzier shpejt dhe e lemë të ziejë derisa të trashet. E heqim nga zjarri dhe veçan, rrahim të verdhat e vezëve me qumësht dhe duke i përzier ia hedhim supës. Pastaj supën e rregullojmë me kripë e piper të zi dhe në fund i hedhim copa buke të prera në kubikë të vegjël, të skuqura me gjalpë (kruton).

Për 4-5 persona duhen:

miell misri një filxhan çaji, 1 lugë gjelle gjalpë, vezë 2 kokrra, qumësht 1 filxhan çaji, bukë 2 feta, kripë, piper.

96. Mëmëligë misri

Në ujë të vluar me kripë ose shëllirë shtojmë një pjesë të yndyrës dhe pasi të marrë valë hedhim menjë-

herë gjithë sasinë e miellit, e përziejme që të mos krijohen kokrra dhe e ziejmë derisa mëmëligia të piqet dhe të shkëputet nga anët e tenxheres. E heqim nga zjarri dhe me lugë të lyer në yndyrë e nxjerrim në pjatë lugë-lugë. Jepet e ngrohtë dhe sipër i hidhet djathë i thërmuar (sipas dëshirës). Kur përgatitet me shëllirë nuk i hidhet djathë.

Për 4-5 persona duhen:

miell misri 2 filxhanë çaji, gjalpë 2 lugë gjelle ose vaj 2 filxhanë kafeje, kripë, djathë i thërmuar 2 filxhanë çaji.

97. Polenta me pak mish

Mishi i derrit pritët në copa të vogla dhe kaurdisët me yndyrë, qepë, shtohet salcë domatesh, kripë, piper, dafinë, pak ujë dhe lihet në zjarr të javashëm të ziejë derisa të jetë gati.

Në një enë me ujë e kripë pasi uji të marrë valë, hidhet dhjamë derri dhe duke e përzier me lugë druri shtohet miell misri i situr dhe lihet të ziejë derisa masa të trashet. Kjo masë shtrohet në tepsi të lyer me yndyrë dhe sipër hidhet mishi i përgatitur. Piqet në furrë për 15-20 minuta.

Për 4-5 persona duhen:

mish 200 gram, dhjamë 3 lugë gjelle, qepë 2 kokrra, salcë gjysmë luge gjelle, miell misri 3 filxhanë çaji.

98. Dhallanik me miell misri

Në një enë me ujë të vakët, yndyrë, kripë e miell misri të situr zëmë një brumë me trashësi mesatare dhe e hapim në tepsi të lyer me yndyrë.

Në tenxhere me yndyrë kaurdisët miell misri i situr, shuhet me dhallë ose kos të holluar dhe lihet të marrë valë, hiqet nga zjarri dhe si të ftohet pak hidhen vezët, kripë, djathë i thërmuar dhe derdhet në tepsi ku kemi shtruar brumin. Spërkatet me yndyrë dhe piqet në furrë.

Për 4-5 persona duhen:

miell misri 2 filxhanë çaji, yndyrë 2 filxhanë kafeje, dhallë 4-5 filxhanë çaji, vezë 2 kokrra, djathë i thërrmuar 1 filxhan kafeje, kripë.

99. Oshmare korçe

Në një enë me gjalpë, djathi skuqet pak, hidhet qumësht dhe pasi merr valë i hidhet mielli i misrit i situr, përziehet me shpejtësi që të mos krijohen kokrriza dhe piqet derisa të shkëputet nga anët e enës dhe të dalë yndyra. Vendoset në pjatë lugë-lugë dhe shërbehet e ngrohtë.

Për 4-5 persona duhen:

miell misri 3 filxhanë çaji, qumësht 4-5 filxhanë çaji, djathë 2 filxhan kafeje, gjalpë 2-3 lugë gjelle, kripë.

100. Fërgesë me miell misri

Skuqet mielli me yndyrë, shuhet me shëllirë djathi ose me ujë, përziehet që të mos krijohen kokrriza dhe zihet derisa të bëhet një masë me trashësi mesatare. Gjatë zierjes hidhet spec djegës e kripë. Në fund hiqet nga zjarri dhe rregullohet me hudhra të shtypura.

Për 4-5 persona duhen:

miell misri 1 filxhan çaji, yndyrë 4-5 lugë gjelle, hudhra 4-5 thelpinj, kripë, spec djegës.

101. Fli me miell misri

Spinaqin e pastruar e të larë e përvëlojmë me ujë të vluar me kripë 3-5 minuta, e kullojmë, e presim me thikë dhe e vemë në tigan me yndyrë duke e përzier në zjarr për 5 minuta. E heqim nga tigani dhe e përziejmë me kripë, piper, vezë, djathë të thërrmuar e nenexhik. Në një tenxhere hedhim qumësht, pak ujë, kripë dhe duke e përzier shtojmë miellin e misrit të situr derisa të bëhet një brumë më i hollë se ai i petullave (sa të vishet gisht). Në tepsi të lyer me yndyrë hedhim një shtresë nga